

# Songen frå vest

Knut Øygard

Roy Vorland

Musical score for the song 'Songen frå vest'. The score is written in G major and 4/4 time. It consists of two staves of music. The first staff contains the first six measures, and the second staff contains the remaining six measures. Chord symbols are placed above the notes: G, D, G, C, G, D in the first staff, and C, G, Em, C, D, G in the second staff. The music features a mix of eighth and quarter notes, with some rests and a final double bar line.

Han breier seg, øygarden, lyngbrun og låg,  
med steingrøe holmar i synet.  
Det blinkar i tjørner, det blenkjer i våg,  
og storhavet bårar i brynet.

Tidt stod eg i undring ei solrenningsstund,  
når doggdropar glitra i graset,  
og heimane helsa frå øyar og sund  
god morgon med solgull i glaset.

Og skutene stemnde i skjergarden inn  
på heimferd frå vidande verda.  
Men inne på bryggja stod borna i ring  
og vinka velkomen frå ferda.

Varmt banka mitt hjarta når landet eg såg  
der havstril i hundreår budde,  
og bygde seg grender der gråsteinen låg  
og åker i villmarka rudde.

Ut rodde dei gamle i seksæringsbåt  
til havs på ei saltvaska tofte.  
Dei henta or djupet den maten dei åt,  
og storgjævt var havet så ofte.

Men bles det opp nordvest med rok og med eim  
som brått kunne over dei falle,  
då hende det stundom at ingen kom heim,  
for storbåra slukte dei alle.

Og Herren han tok, men Herren han gav  
og svara so raust våre bøner.  
Enn lyfter seg, øygarden, solgylt or hav  
med livsfriske døtrer og søner.

Tekst: Knut Øygard.

Musikk: Roy Vorland.



Foto: Rune Fjæreide.